



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

TAPAK 10

Taoba Chhattisgarh CM Jogi temang kanga mejungi lir

IPL thitsüba ajanga USD billion tesaadangka akoksatsü akok: Arun Dhumal

VOL. XVII NO. 195 (ADOK 195) DIMAPUR

RASEMNÜ (WEDNESDAY) MONUPII (MAY) 13, 2020

₹ 5.00

PM Modi-i sen lakh crore 20 teyari agütsütsü sangoktsür

New Delhi, May 12 (Agencies): Prime Minister Narendra Modi-i taonung coronavirus tensa indang jembidang, rongsenketsüing atema sen crore lakh 20 teyari agütsütsü metetdaksüo.

LOCKDOWN ATSÜLANGTSÜ "Iba ya India indang GDP nungi 10% lir. Iba ya MSMEs aser ochishia tax agütsürtem asoshi lir" ta PM Modi-isa ashi.

"Asüng nungi tenzüka, finance minister-i 'Atma-nirbhar Bharat Abhiyaan' len anitsü atema senotsü agütsüba osang tejangka metetdaksütsü" ta paisa ashi.

Modi-isa ashiba agi "linük ajunga shibangba ya pezübenbuba atema atsülangtsü akok.

Chief Minister balala den jembidang iba telemetba agiogo.

May 18 matongdang lockdown 4 indang osang tejangka metetdaksütsü."

"Kodanga mebilemdangba tensa ka ajurua lir. Asenok shinga dak-a memetaloki liyonga aotsüla saka ibaji pei atema dang bilemetsüba masü," ta Modi-isa taonung ashi.

"Asenok tashitaitba akümtsüla. Asenok sasa kümzüka alitsüla aser kasa mapang nung tejakleni aotsüla. Putu 21 bubaji India indang ta tangari jembiba asenoki angashiogo saka iba ya alizüing ka dang masü saka asen teinyaktsü tebilemetsü ka lir. Asenoki ibaji atongtsüla. Tanü alima tensa ajanga shinga dak memetalokba India ka dang lir ta sayur" ta Prime Minister-isa metetdaksüo.

Nagaland sorkari sen crore 7.57 teyari agütsüo

Dimapur, May 12 (TYO): Tangalen anendaka alirtem nem Nagaland sorkari senotsü teyari agütsüba nung Rs. 7.57 crores endokogo, ta Principal Secretary Home, Abhijit Sinha-i ashi.

India nung COVID-19 lockdown ajanga Nagaland nungi oa alir nisung 19464-i teyari nungdaka tentung agütsü. Parnok rongnung mapa inyaker 14357, kaketshir 4933 aser shiranger 175 lir. Parnok indang bank account tem nung sen enoktsüo, ta Abhijit Sinha-i metetdaksü.

Tanü nikongtsütsü 4:00 ako tashi nung Nagaland nungi sample 882 tashi tendangtsü atema bener yokba nung sample 872 negative putetba osang nguogo. Tanüingba

sample 10 indang osang ano mangu lir, ta paisa ashi.

Maneni, Truenat machines ajanga sample 11 tendanga liasü aser ajak negative ta putetogo, ta paisa shisem.

Mongulbarnü nisung 6532 tashi screen süo aser Facility Quarantine nung nisung 86 yua lir.

Tangalen nungi Nagaland-i meyipa arurtemi nCOVID-19 Nagaland- Visitors App nung tenüing zülüoktsüla. Iba app ya android amshirtem atema yanglua lir aser iOS mesüra tanga amshirtemi toll free helpline No-1800-345-0019 den tongteptsü akok, ta Principal Secretary Home-isa metetdaksüo.

Nagaland nung BSL-3 lab kobi melii lapoktsü

Kohima, May 12 (TYO): Naga Hospital Authority Kohima (NHAK) nung COVID-19 sample tem tendangtsü atema Bio-Safety Laboratory (BSL-3) yangluba renemogo, ta Department of Health and Family Welfare (HFW), Nagaland-i tanü metetdaksü.

BSL-3 atema infrastructure aser human resource training dak sendakba maparen ajak renemogo aser Mongulbarnü lab tendangogo, ta HFW atema Secretary, Kesonyu Yhome-isa ashi.

Iba lab indang maparen ajak temogo aser Indian Council of Medical Research (ICMR) New Delhi dangi video graphic evidence aser positive control

unit yokogo. Department-i iba lab lapoktsü atema osang atar, ta paisa ashi.

ICMR nungi Bodbar tashi nung osang arutsü aser iba sülen department-i mapa tenzüksü, ta Kesonyu Yhome-isa metetdaksü.

Tang tashi nung Nagaland nung COVID-19 aketer ka dang mali aser temulung melemba sample tem Assam aser Manipur nung tendangtsü atema yoker.

Tanü tashi nung Nagaland nungi sample 882 tashi tendangtsü atema bener yokba nung sample 872 negative ta putetba osang nguogo aser sample 10 indang osang ano mangu lir, ta HFW ktdangsertemi ashi.

Ao Sendeni Assam artsülen alirtem semdang



Dimapur, May 12 (TYO): Ao Sendeni Assam artsülen aliba yimtsüing 13 (terasem) tashi May 8 aser 9, 2020 anogotem nung semdanga jajaogo.

Iba mapang parnoki artsülen alirtem denji senotsü teyari den mask lemja liasü. Iba den külemi Border-belt nung alir nüburtem den longjemer telemetba kar agio ta ta Ao Senden Tir, Wb. Chubawati Longchar aser Tongti Tezülur, Wb. Imtipokiyim nati

metetdaksü. Telemetba agibatem rongnungji Nagaland sorkari tuyuba ama Longchem-Saring lenmang ajanga shibangtsü aser Saring temeket yim pezüi Assam sentaktepba lenmang ajak shibanga ayutsüba dena lir.

Iba tenokdangba alema inyakra yim pezü sanger den Ao Sendeni merenshitsü lemtet.

Mokokchung district kübok artsülen aliba yimtsüingtem

(border-belt areas) asoshi COVID-19 dak sentakba rongdak nungdaktem ajak Ao Sendeni sorkar department balala den tongtepratepa achaayanga inyaksütsü renem. Item rongdaktem rongnung chiyungtsü, Agri department ajanga metsüh tapu balala aser CMO ajanga mozütem meshitsütsü dena lir.

Maneni, tang nungi tangar dak metaloker malitsü nükjidong nung yimtsüingtem ajaki pei lu/tzülu nung tsük metsüh yoka alu meranga inyaksütsü bangiem.

Ao Senden-isa May 12, 2020 nungi Mokokchung District single entry point check-post NH 2 Longkhum lushi nung aliba semdanga Administration, Police aser Medical ktdangsertem den shisalemsatepa liasü.

Northeast state tem nem Revenue Deficit Grant agütsüo

New Delhi, May 12 (Agencies): May 11, 2020 nü Centre sorkari state 14 nem sen crore 6,195 agütsüo. Iba ya Post Devolution Revenue Deficit Grant indang itashi agütsüba shilem lir.

COVID-19 tensa ajanga state tem yaritsü atema sen agütsür, ta Finance Minister Nirmala Sitharaman-i Twitter nung metetdaksü.

Yashi agütsüba sen ya Andhra Pradesh, Assam, Himachal Pradesh, Kerala, Punjab, Tamil Nadu, Uttarakhand, West Bengal, Tripura, Manipur, Meghalaya, Mizoram, Nagaland, aser Sikkim state tem atema lir.

"State sorkartemi rongsenketsüing dak sendakba maparen inyaksüla aser lockdown ajanga sensotemi takoksa anguba ajema kümdaktsütsü atema sen ya mapang matongdang agütsür" ta Finance Minister'er office-i metetdaksü.

Sen teimba ka state sorkaritemi mapa inyaker nem itasen agütsüba nung endoktsü imlar kechiyong taküm April ita parnoki tax saruba nung takoksa nguogo.

State 14 rongnung May ita atema sen teimbaji Kerala nem agütsüo. Kerala nem grant-in-aid sen crore 1,277 agütsü aser parnok sülen Himachal Pradesh

nem sen crore 953 agütsüo.

Maneni, Punjab nem Rs 638 crore, Andhra Pradesh (Rs 4,91 crore), Assam (Rs 631 crore), Manipur (Rs 235 crore), Meghalaya (Rs 40 crore), Mizoram (Rs 118 crore), Nagaland (Rs 326 crore), Sikkim (Rs 37 crore), Tamil Nadu (Rs 335 crore), Tripura (Rs 269 crore), Uttarakhand (Rs 423 crore) aser West Bengal (Rs 417 crore) lir.

15th Finance Commission-i ashiba nung ajemdaker Centre-i state tem nem March 14, 2020 nü Post Devolution Revenue Deficit Grant mezüingbuba installment agütsü.

PM Cares Fund ya Covid agi shirangertem atema amshitsüla

New Delhi, May 12 (Agencies): Congress-i maneni PM Cares Fund atema ashishitepogo aser CAG nem balaka audit südaktsütsü atema takhangba agütsüo.

"Covid-19 agi shiranger asoshi PM Cares Fund mamshiba atema onoki shisabulur" ta Congress Senior spokesperson Abhishek Manu Singhvi-i ashi.

"PM Cares Fund ya CAG ajanga independent audit asütsüla aser sen koma amshir iba indang osang ya anogoshia metetdaksütsüla" ta Singhvi-isa ashi.

COVID-19 wara ajanga tensa bentsür aruba nung amshitsü aser timtem ajururtem yaritsü atema national fund ka nungdak ta ajiteta 'Prime Minister's Citizen Assistance and Relief in Emergency Situations Fund' (PM CARES Fund) tenzüik. Iba ya public charitable trust ka lir, ta pmindia.gov.in ajanga ashir.

Prime Minister Narendra Modi-i nungdakba ama meinyaker aser Covid-19 tensa nung nübortem ajungtsü atema telemetbatem magir ta Congress-i aitsür.

PM-CARE fund amshiba nung tim masüba lir kechiyong iba sen ochishia mamshir aser miimshir, ta Congress-isa aitsüo.

"Nübortem asoshi mebilemetsüba Prime Minister ka ta putiotsüi PM Modi bilemtetsü" ta Hombarnü Congress-i Twitter nung metetdaksüo.

Modi-i health workers atema PPE kits asoshi mebilemetsür. Pai senotsü teyari magütsür aser lockdown osang magütsüdag sorkari terenemba kecha maliasü, ta parnokisa aitsüo.

India nung International Nurses Day mongogo

New Delhi, May 12 (Agencies): Tanü International Nurses Day amongdang Union Minister of Health and Family Welfare, Dr Harsh Vardhan-i video conference ka ajanga sentong ka agiogo.

International Nurses Day ya Florence Nightingale asoba anogo nung amonger aser la sor taküm küm 200 jungogo.

Taküm iba anogomung ya kanga tongtipang lir kechiyong

World Health Organization (WHO)-i 'Year of the Nurse and the Midwife' küm ta sangdonga lir.

Tanü Dr Harsh Vardhan-i ayongba video conference nung nurse lakh aika online ajanga shilem agiogo.

Dr. Harsh Vardhan-i COVID anogotem nung nurse temi mapa tajung inyakba atema tenüingsang agütsü.

"Tanü ni tawa asürtem Smt.

Jyoti Vithal Raksha, Staff Nurse, Pune; Mrs. Anita Govindrao Rathod, Assistant Matron, Pune; and Ms. Margaret, Nursing Officer, ESI Hospital, Jhilmil bilemter. Parnok kibongtem den asüikhu lemsateper. Maneni iba tashidak anema raraba nung ni nenok den külemi noktaker aser asenok kümzüka ayutsü atema teinyaktsütem ajak inyaksü" ta Dr. Harsh Vardhan-isa metetdaksü.

(Maneni tapak 2 nung...)

CORONAVIRUS WARA ASENOK LONGJEMERAKOKTSÜ ASOSHI -

Kechalena Moi Kidang Mongang; Tangar Anasai Tou; Teni Tebang Sü agi Nembangang; Temang Tashi Itita Yuang; Kidang Asentzü Sendoka Exercise Agiang aser Sarasademang.



Dimapur, Monupii/May 12, 2020 : COVID-19 tashidak wara mechi state tesem ajungalen lenmangtem shibangba agi pei aliba tesem/district (Mokokchung) bushia moteti alirtem Ao Kaketshir Telongjem Dimapur (AKTD)-i achayanga Dimapur nungi May 12, 2020 anepdang Mokokchung bushia yoktsü lia Dimapur Ao Baptist Arogo nung Associate Pastor, Toshi Longkumer-i sarasademtsüba noksa ka yangi angur. Mongulbarnü Dimapur nungi nisung 100 shi Mokokchung bushia bus asem nung yokogo. Ano maneni Bodhbarnüa nisung 200 shi pei tasoli, Mokokchung bushia yoktsü atema AKTD ajanga anepaludar.

Kohima nung International Nurses Day mungogo

Kohima, Monupii/May 12 (TYO): Trained Nurses' Association of India (TNAI), kohima branch ajanga May 12, 2020 nü Lobby Hall, Naga Hospital Authority, Kohima nung International Nurses Day mungogo.

Alima ajunga nung COVID-19 tashidak wara agi sünger aliba mapang "Nurses a voice to lead : Nursing the world to health" omen nung ajemdaker alima ajungalen Mongulbarnü International Nurses Day munga liasü, aser ibaden lirumedema Naga Hospital nungi Nurse temi milen tsüklokba sentong tatsüka agi.

TNAI, local branch, Kohima nung tir, Rita Angami-iba sentong nung ashiba agi, COVID-19 tashidak wara mechi tesüiba kümtem nung ama iba anogo nung sentong tulu ayonga magiteter. Saka modern nursing ngutetla, Florence Nightingale bilemteta iba anogo amunger.

Taküm nurse tem anogo ka khenyongi balaka, kechiaser Florence Nightingale sor taküm agi küm 200 ajunger aser World Health Organization-i 2020 ya 'Year of nurses and midwife' ta nungja agütsü, ta Rita-i ashi.

Lai nurse ajunga dang iba ama tensa nung ka küma lungjemer temolung agüja

inyaktsü ajungshi.

Nurse ya wadang tajung ka lir, kechiaser yangji anibelem mesasai inyaktsüsa akümer, bendanga agütsür temeim aser pei dang taoba ta bilema inyaktsüla, ta laisa ashi.

Iba sentong nung Nursing Superintendent, NHAK, Nothusanu-i milen tsüklok aser NHAK chaplain, Vikepu Tepa-i sarsadem.

Iba anogomung nungtem nung TNAI, local branch Kohima ajanga Kohima Orphanage and Destitute Home, Dimapur Road aser Cradle Ridge Hospic, Kohima semdanga jang aser nungdakba osettsüset lema agüja liasü.

Nagaland sorkar kanga junga renemshitsüla: NPYC

Dimapur, Monupii/May 12 (TYO): Tang COVID-19 tashidak wara agi tesem ajungalen sünger aliba mapang state nung nüburtem rongsenketsüng tsütsü tim atemba asoshi süoki ia bilemtsür, ta Nagaland Pradesh Youth Congress (NPYC) sangdong ka ajanga ashi.

Tang tensa nung Nagaland ya COVID-19 tashidak wara dak sendakba nung Green Zone nung liaka aser bendanglen nungi menar aruba virus tepsettsü merangaka tang ama asenok mapang tatsükabo alitsü, ta sangdong ajanga ashi.

Nüburtem nem Centre aser State sorkari jang-o-tzü aser danga teyari balala agükja aruba atema belar, saka Nagaland ya sen tarulen lenmang maliba state ka lir, anungji tang aliba sorkari nüburtem kobika yaritetsü.

State nung lanurtem ama aser

nüburtem khuret angatetba political party ka ama Nagaland sorkari nüburtem tepok taziung malitsü atema sentongtem timi yanglutsüla, talisa Agri & allied sector ajanga inyaktsüla, ta NPYC tir, Vilhousielie Kenguruse-i sangdong nung ashi.

Agri aser sendaktepa aliba sector tem mesamai lidaktsütsü atema state sorkari PHED, PWD aser Power department inyakim junga temolung agütsütsüla, kechiaser state rongsenketsüng renlokba nung item department yagi tongti shilem agir.

COVID-19 tashidak wara agi linük tesem ajunga aser kidanger state tem sünger aliba mapang tang masüyonga meilongibo dang state nungi bener aruba osettsüset anünga akümtsü, kechiaser item osettsüset yangluba aser chiyongtsü züsenba ajema

akümer. Anungji state sorkari jelia state nung item timtem majangshitsüsa renemshia alitsü mepishir, aji mesüra kanga menua akümtsü, ta NPYC-i ashi.

Kasa mapang state sorkar aser Department of Health & Family Welfare ajanga state nung COVID-19 testing lab (BSL3 aser BSL2) nung tekeratiba nungi mapa inyaktsüsa renemya alitsü imlar, ajiasünung dang COVID-19 tashidak tendangba nung dang state dak metaloker malitsü, ta amanger, ta parnokisa ashi.

State sorkar dang masü saka senso tajung ajaki asen otsüla-oboula nung mapang meranga inyakatetba agi pei peria aser dangertem den lemsatepa agiba yimya tanaben amshitsü merangdi aser COVID-19 tashidak wara atema rara tajung raradi, ta NPYC-isa ayongzük.

MCD-i par nübur danga state nungi marui atatsü ajungshir

Dimapur, Monupii/May 12 (TYO): Muslim Council Dimapur (MCD) ajanga Muslim nung nungi Nagaland-i maruteti alirtem dang taruba ita ana tashi mesüra sorkari tensa junga kümogo ta mesangdong tashi marui atatsü ashi.

Muslim nungertem ajangzüktsü aser talisa Nagaland nung aliba senso ajak taküm kümzuka alitsü mechi Muslim kintem lungjemer iba telemtetba ya agi, ta MCD working president Ahidur

Rahman-i ashi. State-i arunüaka maruteti alirtem nem council ajanga teyari agütsütsü merangtsü mesüra Nagaland sorkar dang yaritsü mepishitsü, kechiaser parnok timba MCD aser Jama Masjid committee balala nem state-i arutsü mulunga aliba metetdakja tenüng agüja lir, ta ashi.

Maneni district administration den lungjemer quarantine centre amenoktsü aliba maparen athir, ta sangdong ajanga ashi.

Bank of Baroda-i Zhadima yimdaklir nem teyari agütsü



Bank ketdangser aser teyari angurtem Zhadima nung May 12, 2020 nü tangokba noksa ka yangi angur.

Kohima, Monupii/May 12 (TYO): Bank of Baroda, Kohima branch indang chief manager, Suresh Kaushik den High School branch joint manager Seyie Vitsu aser staff temi May 12, 2020 nü Zhadima yimdaklir nem jang, dal, shini, M. oil amala nungdakba chiyongtsütem lema agütsü.

Zhadima VDB secretary Roko Angami menden sür

sentong tongmelang ka agi, kong Rev. Khriezolie-i sarasadem aser Head GB, Kedilezo M Keditsu-i tepela o jembia liasü.

Kasa mapang yimdaklirtema Bank ketdangsertem dang COVID-19 tashidak wara agi bona aruba aliba tensa tamajungdang yimtsüng nung nungdakbapur nem teyari agütsüba atema pelaba lemsatsep.

Chakhesang Public Organisation-i ayongzük

Dimapur, Monupii/May 12 (TYO): COVID-19 tashidak wara poktetba mechi tesem ajungalen nisung senzüsempogba nokdanga aliba ajanga kidangi maruteti aliba kaketshir aser mapa inyakertem atema süoki ia bilemtsür, ta Chakhesang Public Organisation (CPO) sangdong ka ajanga ashi. Tensa ajanga nüburtem pei ki aliba state bushia arung ta ashitsüsa aküm. Ajisüaka tang tensa nung state-i arutsü renemshiba ajanga tajangzük kangabo malitsü, ta ashi.

Totuyuba yimya balala agütsüba nung tera dang metokmeperi adokra nüburtem anisungzük malitsü aser iba

ajanga timtem tali agütsütsü. Anungji asen state alema orr kidangi maruteti aliba kaketshir aser mapa inyakertem dang kidangi meyipa shilangtsü sentong aliba khen repringshia mapang tatsüka pei aliba tesem nung atatsü Chakhesang Public Organisation ajanga mepishir, ta sangdong ajanga ashi.

Kasa mapang tsüraburtem dang pei tanurtem tanaben anir arutsü tejangraba liaka khen shisadangtsü mepishir. Iba dak sendakba nung kaketshir aser mapa inyakertem state-i marui mungzuka atatsü lemtetra, parnok nem state sorkari tapet teyari agütsütsü mepishir, ta sangdong ajangasa ashi.

India nung International... (TAPAK 1 NUNGI...)

"Asen alima anema lidaktsütsü atema nurse temi anibelega inyakba atema pelar ta ashitsü atema International Day of the Nurse amonger. Tang parnoki COVID-19 madak

takok angutsü atema mapa tajung inyaker. Nurse aser parnok kibongtem dang kangasa pelar" ta Prime Minister Narendra Modi-i tanü metetdaktsü.



Mokokchung nung tiyong nung police-temi gari oliorar sota meitba aser nüburtem dokan nung shishitepba mapang tangokba noksa nung angur. May 5 nungi tenzüka Mokokchung nung chiyongtsü dokan den külemi ano tanga dokantem kar lapoktsü tetuyuba agüja lir. Iba anogo nungi tenzüka Mokokchung nung gari jajaba aser nisungtem jabang mayim shishitepba mazuokteti arur. "Tang amai dang mazuokteti ora, tensa tiaji tamajungba ajurutsü menua mali, anungji, district administration-i iba dak sentakba nung yakta mapa kar inyaktsüla", ta public kati iba osangbener den jembidang lemsatsep. (Mokokchung, May 12, 2020)

Manipur nung tangalen nungi arurtem atema bus gari 50 yok



Imphal, May 12 (Agencies): Tangalen alirtem Manipur kübok Jiribam railway station atongba sülen anir aotsü atema bus gari 50 tashi apusogo.

Jiribam ya Imphal nungi kilometre 220 shi pilar lir.

Bus tem apusoa yokdang Transport director Mercina Panmei aser Transporters and Driver's council tir T Ranjit Singh na den ketdangsertem liasü.

May 12, 2020 anüingdang Manipur nung 1140 tashi special train ka ajanga arutsü, ta transport director-i ashi.

Parnok dak screening aser tanga medical inyakym

tembangba sülen May 13 anüingdang Jiribam nungi parnok anir apusotsü, ta transport director-isa shisem.

Bus nung tzü tajemtsü, chiyungtsü aser hand sanitizers bener apusogo, ta Transporters and Driver's council tir Ranjit-ia ashi.

Maneni Jiribam-i tanga bus tem yoktsü aser ajak nung tzü tajemtsü, chiyungtsü aser hand sanitizers bener aotsü, ta paisa shisem.

Manipur State Transport department den transporters and drivers' body-i special train ajanga arurtem anir arutsü

atema bus 150 yoktsüba mapa inyaker.

Deobar nikonngtsütsü Chennai railway station nungi Manipur nung 1140 amenba special train ka apusogo.

Tanga yimtittem nunga anendaka alirtem state-i anir arutsü atema state sorkari mapa inyaker.

Punjab aser Karnataka nunga Manipur nung anir arutsü atema special train tem renema lir, ta osang ajanga ashi.

Manipur chief minister's COVID-19 relief fund ajanga tarurtem train taa agütsütsü atema sen lemozükja lir.

Tripura nung aayanger ka kinungertemi pa talidaki marudaktsü

Agartala, May 12 (Agencies): Tripura yimti Agartala nung aayanger pai pa talidaki aur saka par kinungertemi pa magizük. Pa dak COVID-19 mali.

India ajunga shibangba ajanga Agartala nung alisang Gobinda Debnath ya Assam nung par kinunger ki ka nung mongzuka liasü.

Ajisüaka, tesüiba anogo ana tejakdang Gobinda Debnath-i pa talidaki arua liasü.

Pa ki tonga aruba mapang, meimlaika dang pa kinungtsü aser jala naprongla densema kinungertemi pa kidangi maitdaktsü. Tesüsa, pa quarantine centre kati ao.

Arishi küm 37 tain Gobinda Debnath-i pa talidaki shilangtsü atema sen 30, 000 endoka liasü. Pai par ki atongtsü asoshi lenmang süia aru aser Deobar aonung Assam nungi gari ka nung Agartala atong.

Debnath ya Agartala kübok Joynagar tesem nung 'government quarter' ki ka nung alir.

Pa ki tonga aruba mapang, kiyongertemi pa ya COVID-

19 agi shiranger ta temulung melemi bilema ki telungi aitsü asoshi tenokdangba agüja liasü.

Debnath-i ashiba agi, "kü kinungtsü-ia ni kilungi maitdaktsü. Ozü kidangi maitdaktsütsü asoshi kiyongertemi kanga sashia rongshiba ajanga kü kinungtsü-ia ni kilungi ni aittsü asoshi nokdanga liasü."

Debnath kinungtsü Dalia Das-i ashiba agi, ni iba quarter nung kütsü aser tanurtem den alir.

Tangar lendongi aitsüsa ni mebilemdangi meratem maginür, ta Dalia-isa ashi.

COVID-19 tetendangba nung Debnath dak iba tashidak meputetyongjia, Debnath ya par kidang tetsüng ajemoktsü asoshi kiyongertemi tenokdangba agüja liasü.

Debnath-i pa dak coronavirus maliba kuli agütsüyonga, par temeket nung alirtemi pai ashiba o ka danga manga.

Iba osang angazükba sülen, Debnath aliba tesem yagi District Health Officer, Sangeet Chakraborty aser par telok tonga aru.

(Maneni tapak 9 nung...)

Manipur nung BSF jawan ka pa sasa khaset

Imphal, May 12 (Agencies): Manipur kübok Churachandpur district nung Hombar aonung 10:00 ako meta Border Security Force jawan kati külem jawan ka khasetba sülen pa sasa khaset.

Subsidiary Training Center (STC) nung BSF head constable kati pa indang service rifle agi constable ka dak injang khaloktsü.

Iba sülen head constable-i pa sasa khaset, saka pa akhaba constable ji mozü kidang anioka lir, ta ketdangser kati ashi.

Sepaitemji STC nung director indang security pur tem lir. Director ya Inspector General jenjang nung ketdangser ka lir.

Arunachal nung COVID-19 testing lab tanabuba lapokogo

Itanagar, May 12 (Agencies): Mongulbarnü Arunachal Pradesh nung COVID-19 testing lab tanabuba lapokogo.

Health Minister Alo Libang-i Itanagar anasa Naharlagun nung iba lab lapoktsü.

COVID-19 testing lab ji Intermediate Reference Laboratory nung amenok aser TRUENAT machines ajanga anogoshia sample 20 tendangtetsü.

Department-i mapang tatsüka tsüingda COVID-19 Testing Centre lapoktetba atema tenüingsang agütsür, ta Libang-i ashi.

Iba ajanga TRIHMS

Naharlagun nung Testing Centre nung ajuruba khuret ajema akümtsü, ta paisa ashi.

State nung mezüingbuba COVID-19 testing lab ji April 30, 2020 nü lapok aser anogo nung sample 100 tendangteter.

Tang tashi nung Arunachal Pradesh nung COVID-19 tendangtsü atema sample 2,061 tashi bendenogo aser 1,477 tashi negative ta putetogo. Sample 521 indang osang ano mangu lir.

Arunachal Pradesh nung COVID-19 agi shiranger ka aliba taoba ita taneptsü nguogo. Tang Arunachal Pradesh nung COVID-19 agi shiranger ka danga mali.



Guwahati kübok Fancy Bazar nung aliba Hotel Rajkamal Containment Zone ka kümdaktsür ta Kamrup Metro district administration-i tanü metetdaktsüogo. Hotel Rajkamal nung khu belener Mungru Sahani dak COVID19 aliba putetba sülen Kamrup Metro district Deputy Commissioner Biswajit Pegu-i iba tetuyuba agütsü. (Guwahati, May 12)



Agartala nung Institute of Nursing Science nung Faculty aser kaketshirtemi International Nurses Day amongdang agiba noksa angur. (Agartala, May 12, 2020)

Bhattadev University tatidang osang sangdongogo

Bajali, Monupii/May 12, 2020 (Agencies): Bhattadev University, Bajali (Assam) kübok taoba küm (2019) December ita B A, B Sc aser B Com mezüing semester tatidang agiba indang osang ya Mongolbarnü (12.05.2020) sangdonga liasü.

Iba University ajanga achayanga agiba mezüing UG examination nung kaketshir/candidate 889 agi tatidang agütsü aser iba nungi parnok 422 takok

University website: www.bhattadevuniversity.ac.in. nungi kaketshirtemi parnok

indang result den külemi internet copy indang marksheet agizükttetsü, ta Controller of Examinations ajanga metetdaktsüogo.

Kasa mapang, COVID-19 wara agi shiranger maneni dang timba akümba ajanga, iba wara azüoktsü asoshi India nung maparen shilem timbaka tanü tashi shibanger lir.

India lockdown dak sendakba nung, kaketshirtem aser nüburtem iba wara nungi kümzuka yutsütsü atema school, college aser coaching centre tem densema shisaliok reju ajak shibangtsüogo.



TIR YIMYIM YIMOBILEM (EDITORIAL)

DIMAPUR RASEMNÜ, MONUPII (MAY) 13, 2020

Temelenshi tajung ka angur

Tang alima ajaklen tasüba tashidak Covid-19 wara anema raraba nung alima shia pei pei lima aser nübortem dak apet anogo aser mapang shia inyakyim melenpet melena aoba mapang ka lir. Item inyakyimtem rongnung nisungtem kima yimdong nung pei mulungba mapang mashi ka nung senzüsü memelar, shishilembadaka akhi ama dokantem pei pei mulungba mapang melapokdaksür aser garitema pei senzünüba mapang apia mesenzüdaksür. Item ajakji nisungtem rongnung memetetika tashidak menatepa moudaktsüsü asoshi government-i anepaluba mapatem lir. Aji oda, Dimapur nunga nisungtem tali kima yimdongi adoka menungzüdaksüsü asoshi anogo shia gari number balala senzüsü ozüing ka agüja lir. Iba inyakyim ajanga Hombar, Bodbar aser Hokolbar anogotem nung gari number 1,3,5,7,9 agi atemba garitem senzüsü melar aser tanga tanungba anogotem nung gari number 2,4,6,8 aser 0 agi atembatem senzüsü melar. Tetezü anogo asem nü ana agi alemtsü makokba züingya (odd number) agi tembangba gari number alirtem senzüsü aser anogo pezünüji ana agi alemtsü akokba züingya (even number) agi tembangba gari number alirtem senzüdaksüsü. Iba inyakyim ajanga anogo shia yimti nung alir gari tesadangka mesenzüdaksüi nokdang aser tashi manga senzürä sen achir. Iba ozüing ya yakanü May 11 Hombar nü nungi amshi tenzükba anogo nung ozüing raksartem gari 746 dang senchi achiba sen ajak agi 1,41,050 (Sen lakh ka meyerijang lirka ser tenem) sarutetogo aser iba senji government senpong nung enoktsüsü ta Dimapur Police Commisioner-i metetdaksüba osangji meimlaba osang tajung ka lir. Ashiko, tamalena yamala ozüing raksartem dang police-temi senchi achiba sen government senpong nung enokja alitsüa akok saka tangashibo tangang angashir. Anogo ka nung yimti ka kija nung police-temi ozüing raksartem dang nungi sarutetba sen lakh dak tali government senpong nung enoktsü tenzükba Nagaland nung ochi laoa aliba shia arur südi ta kanga pelaa bilemer. Mapang shia Nagaland gate nung department balalai saru saruba indang jembir saka itemji government senpongi aitba indang jembiba kangabo mangashir. Taküm küm Covid-19 wara agi matongdanga, Manipur nungbo ILP amshi tenzükba ita nung sen crore dak tali arua government senpongi aiba osang asenoki iba yimobilem nung züingogo. Item denji kodang asen lima nung government asoshi saruba sarutem indang medemdanga bilemdangdir, ashiko, Nagaland nungbo taoba küm 56 ILP agütsüba nungi aruba sen government senpongi aibaji sen crore a majung alitsü südi. Asen lima nung ILP agütsüsü aser gate anüksü rakteper saka item nungji sarutetba sen government senpongi aitba osangbo mali ta aruba agi, asenok ajak senteper Civil Secretariat nung süngo ajemba sena dena, center government-i magütsüra, asenoksasabo memenoktetter. Tanga state nung ama, Nagaland nunga sen arutsüla mapa inyakba (Revenue generating) department aika lir saka item ajak nung jagi aruba sen agi asenoki küm piyong achiba sen noklang nung shilem ter a memenoktetter, ibaji alima tsüngdang taaktsüka lir. Iba ama mapang ka nung, Dimapur Policetemi kenü kima yimdong nung nokdaker garitem mitba mapang ozüing raksartem dang nungi sarutetba sen government senpong nung enoktsübaji Naga nung tuluba nungi shir tilatiba tashi asoshi tangazüktsü aser temelenshitsu mapa aser mapang ka kümdaktsüsüla. Ochimashiba maparen ochishia kümdaktsüsü asoshi tatar senden nung ozüing ka latettsü menüingdaker mesüra anogo balaka ka ataa lumia amongtsüa menüingdaker, saka tang Dimapur police-temi inyakba amaji, tanü asenok kechi wadang nung nokdaka lir, iba nungji asenok ajak ochishia inyak tenzüktsü tim. Delhi nungi sen talubosa yokba agi masü saka asenoki tang amaji mapa tilaka nungi ochishia inyaka tenzükba agiang Nagalandbo tajungba küma melenshitettsü.

OLEMSABANG

TOTSÜ AGI TARUTSÜ INDANG KAKTETER

- O. Tongpang Jamir, CTN.

YMCA Church ka nung oa küna atentsü asoshi Rev. Dr. Mar Atsongchangeri ashi. Anungji ni tera atentena aser atidaka (kechiyong ni bilem yangji aiür asangur noklang aika tiinng ta adenshia alitsü) oda hai ta langzük. Iba ya Guwahati nung August 8, 1998 Saturday aonung ka liasü. Saka ni bilemba o yangji asangsang nung adener telok-naji anung o ali liasü, kechiyong nisung teintet dang parnok trok/tenet kashi sentep nungji aden. Kü taküm nung mezüingbuba sentep kidangi tsüngsem semzükter atubaji yangji tudang. Okola Reverend-ba jagi Tsüngrem o züp ta renemer anganüa agütsü aser ni ken ka ajanga kuli asü. Nisung ishika asüyonga aroaroa züp ta nisung kaka shia meter kashi pilaa mener sentepji jangratemtsüka agi. Tang ama covid-19 ajanga nübortem sentep magitetba tensa nung iba yimya jagi sentep agi nunga koda jungla ta bilemer. Sannüker aser sayutsüing balalai YouTube ajanga Tsüngrem o kanga junga lemsar agütsüba agi nübortem jenti tzüratemdar aji oda süaka tejak o tejak-na chitepa angababosa madoksar anungji iba mapang toa kodang arutsüar naaa...ta santem jenti tzüraseter...!!

Mapang kabo junga meshisadanger karibo Social Media ya tonga maotsüla kechiyong ibai japujariba mapa lir ta jembir. Tanü putu nung joko Social Media ya alu per agi shiti kolak koda küpanga meyetet ama kümogo aser anogo nung khendanga manguokdang süitsü saksaker. Aji oda covid-19 agi nokdangba ajanga Tsüngrem o ajak iba ajanga proktsüsa akümer. Norway nung Diplomat Christian Louis Lange-i pa Nobel Peace Prize 1921 küm agizükba mapang yamai ashi, "Technology ya tagidak akaba kilir tajung ka lir saka lendong aketba tesayur ka." (Technology is a useful servant but a dangerous master) Aso metsübuba (20th century) nung ayaoka aidang technology renloka oa koda teyari angur, aji oda asüyongbo ano iba yagi mazüoktetba tensa arutsü ta tekümdangtsü küm noklangkashi jilia ashiba tanü technology ajanga koma alima ajanga aramoka aor aseni meteta lir. Anungji asenji lar (Technology) kilir masü saka larjiang asen kilir sädaktsüra koda temoatsü asütsü.

Rem Lanu (Author Sentisashi Aier) kaket tapak 112 first paragraph nung, "Mobile phone nung ano tesümgangtsü kaji, shiti zülutepba ya lir (SMS)." Iba ya 2005 küm adokba. Ano küm 15 dang süi aji saka adangjibala iba tensaji mobile ajanga SMS yoktepbaji ayaojala...papripaaa...ta sa süngmang. Tanübo ibaji züingshidang talisa tanurtemibo kanga menünüa bilemstü (Asenibo mitsüktsü süngjang kata yangluteter masüyonga).

Alima ya taoba mapang 19th/20th century tashi nung küm noklangka agia renlokba o tanü 21st century nung manger sangwadang renlokba-na khenyongi alamajem (beyond comparison). Ano küm 15/20 shi lirbo 2020 küm covid-19 agi timtemdang WhatsApp & Facebook amala nung osangtsüsang yamatosa belenshiba to kodaka...ta menünüa bilemstü südi. Aser tanurtemdang, "Tenü/tebo, alemlibo tanü ama ya technology nung ano kangarabo main asü, anungji onokbo sannükertemi YouTube ta sür ka nung Tsüngrem o lemsaba mobile nungi aji repringasa amunga" ta pei chirnur/semchir den otsü longa kazütsü. Saka iba renlokbaji koba amaka agi alimaji amokbanger alitsü asen nusa kolok agibo atongtsü tasak.

Albert Einstein-i teshisadangtsü olong ka yamai shia lir, "Alima Rara Asembubaji kechi hadir amshia raratsü ni ashitsü makok, saka Alima Rara Pezübuba jibo süng aser lung dang amshia raratsü." (I know not what weapons World War III will be fought, but World War IV will be fought with stick and stones). Covid-19 ya süitemer alima tensa koma melenshia aotsü aseni ashitsü makok. Koyatsü-aputsü yitepa kati ka dak tonglokja virus ya neri yanglu ta, ya ner lab nung poktetdaksü ta temulung malem bilemtepdang raraang adoktsü shibai metet.

Alima ajak remdaka samatsütettsüa hadir balala iba alijak aliri yanglua aka nungji to, itemji amshia rara adokra, azü koya kimungjen nung asü tesemdang mali ama, ya koda asü? ta tangudanger mali remoka samatsü aser kar anungba jagibo adangjibala obala tambu Einsteinba jagi ashisa joko World War IV jibo ashiko süng lung amshiaang raratsüsa akümtsü. Item tejen shin o aser otsütem ajanga aseni tarutsü indangji terabo kaktetadoker.

Covid-19 agi alijak nung alir ajak kidang mokteper, ya koda tesasatsü aser tezüangtsü uluraka. Saka junga shisadanga aika asoshi ya Tsüngrem dangi pei taküm tali bushia aotsü mapang, pei kiyonger/kidangsür den yimjung yanglua mapa tajung inyaktsü mapang, sensaker dang teka salatsü mapang, kaket mezülumai liasüba zülumatsü mapang, kidang furniture balala yangluzüka ayutsü mapang, yongsen mapa angazüka inyaktsü mapang, olaangla tobur junga ataktsü mapang, kaket takaba ajak okshia azüingtsü mapang, oda tatsüba agi Mapatemtsü Mapang taa shitettsüa koka lir. Medemer balala den Social Media ajanga otsü longtepa amungdang, kari nibo kidang table, chair, almirah aika yangluogo ta, nibo kaket ka zülutsü tenzükter joko küm asembuba kodangang mapang ngua renemtettsü ta shisabulua liasüba ajak züp ta renemogo ta, taküm nung Laishiba mezüingdang asüba tangbo Lipok nungi Jungkai Adok tashi lutema züingdar ta, kidang akaba kaket ajak züingmar kaket tasen kar bushia züingnura ta, molok/pakti/tzühshikhu/mora aika renema lir naa kar aliang ta, osang balala angashiogo. Aji asünung ya oda covid-19 yagi tejen sempet liasüba kanga junga sentsü adoka meyushir tang aser tarutsü jenjang junga asameyangtsüranii...ta kanga temulung chiasa bilemer.

Pauli ajangshiba aser pa dak atalokba züingka mezüingma lir. Item rongnung kangasa temulung atangtsüsa pa nungi jilu tajung ajizüktsü aketba kaji T. Mapa 16:25-40 nung

aliba yaa ka lir. Paul aser Silas tena dak anki ponglang ateper amai tepra teperang tsüngden chiokdak judaka yutsü. Aji saka Tsüngrem sayatenya ka agi menoknok anoka tsüngden chiokdak kimung ajak anokshia kishi lapoker nisung shia talenba ajak pa sasa proonng ta sala adok. Item ya ngua Jailor-baji ojalo...ya mekaka sür pei sasa tsüngseta asütsü nok bena tua alidang Pauli songtema yutsü. Na/ni ka asü asübo, "Tangar rishikangshirbo yamajisa asür ati aji Chiang" ta shir repringa lia adanga sädaktsüla akok shibai metet. Saka Pauli tauchi o dang jembir. Jailor-bai asüingdang, "Tamarenertem, kümtettsü asoshi ni kechi inyaktsü tim.?" Idangji parnoki langzü, "Kibuba Yisu dak amangang, aser na aser ner kibong kümtettsü." Iba tatalokba yagi tanüa asenok den kechi jembir teti shisadanga alitsü koda tajung. Asen dang majung beshirdang oda teti kurema alitsü aser künübo tayang küpüktsü bilemer asü? tejen otsü kar ajanga tarutsü lenmang judanga ayur asü mesüra tzü/mi nung punga odaktsüa/rungrepdaksüsü bilemer? Külemi shisadangdi. Paul dak nungi tangazüktsü lir masü na? Ozü ludangeri/office-puri/kidangeri/külem toklang tenzükteri/yimden nung külem tatari... ni nepeta arishiogo ajangla ni temeim agi parnok den jungtepedi ta shisatetra tejen otsü agi tarutsü indangji tajungang kakteta yutsür mesütetlima?

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerer angateta agitsü mepishir



Lockdown ajanga neburtem pei talidaki maruteti aliba May 12, 2020 nü Dimapur aser Kohima nungi Kiphire Town atongba aruba sülen USBLA staff & Kiphire Town Ao Baptist Arogo nungertemi süngo jemdaktsüba yangi noksa nung angur. (IA Kiphire)

Chhattisgarh, India nung Khristan kibongtem anema inyaker

Hyderabad, May 12, 2020 (Agencies): Tan hopta Central India nung Khristan kibong pongu dang, parnoki sobaliba tribal yimsü dangi tanaben memeyipra parnok meyong aluyimba lu meyipa agitsü aser tepsettsü ta amokmeren, ta osang ka ajanga metetdaksü.

May 5, 2020 nü Chattisgarh state nung Bastar district kübok Salhephal yimdam yimsüsürtemi Khristan kibongtemji senden kati jaoka liasü. Ajioda Khristantemji jaokba ama senden jagi aodang yimsüsürtemji Khristantem meyong ali jenjang asadanga liasü, ta pastor Sirisguda Ramdhar-i metetdaksü.

Tetsü-tebou yimsü- süng-long külemer lenir, Dulla Poyami tekülem agitsü atema Khristantem jagi parnok meyong li nung temelaba magütsü liasü, ta pastor-i ashi.

Pastor-i ashiba agi, "Yimsüsürtem jagi Khristantem dang, 'nenoki asen sobaliba sentongtem/amongtsümong nung shilem magir, anungji aluyimba lu nungi tajangzük agitsü atema nenok nem maongka magütsütsü' ta ashi."

Ajioda Khristantem jagi item liji parnok tenung nung register süa lir aser iba li nungji parnok tebok mesütsü atema meranga inyaker ta ashi.

Khristantem jagi yimsüsürtem dang, "Onoki ozü tamangba yimsü (Khristan yimsü) benshir, ajisüaka onoki yimtsüng mesüra kin nem kodanga khuret magütsür, anungji nenoki onok meyong li

rakzüksü makok ta ashi," ta pastor-isa ashi.

Iba sülen yimsüsürtem jagi Khristan ana- Madda Poyami aser Badda Poyami na dak azük. Iba sülen yimdaklir nisung 60 shi adenshia Khristan kibongtem dak azük, ta pastor-isa metetdaksü.

Khristantem dang Khristan yimsü toktsür tribal yimsü dangi meyipang ta ashi, ajisüaka Khristantem jagi memelungba agi ano maneni azük; lokti jagi tetsürtem dak-a azük.

Madda Poyami bo long agi tekolak yirua Jadalpur nung aliba sorkar hospital nung treatment agidar aser Khristantemsa- Bodda Poyami, Raino Poyami, Sumani Poyami, Hande Poyame, Jagri Poyami aser Besalbat Poyami nungera yirua liasü, saka parnokbo hospital nung medical treatment agiba dak alaka hospital nungbo mamong, ta Pastor Ramdhar-i metetdaksü.

Pastor-i ashiba agi, tribal yimsü amangertem jagi süng-long tsüngrem balala külemer aser shiruru tenla agütsür. Yamaji tribal yimsü amangertem jagi mapang shia Khristantem yimtsüng nungi meindoktsü aser parnok li agitsü ta amokmerena arur.

Legal advocacy group Alliance Defending Freedom India (ADF India) den tesendaktep alir lawyer ka, Son Singh Jhali-i hospital jagi oa yirua alirtemji ajuru aser Khristantemji yaria Kodonar police station nung ken o ka agütsü.

Jhali-i, "Ken o pusemstü aser

police-i aibelenertem anema ken o benoktsü atema medical kulitemji kanga tongtibang," ta metetdaksü.

Kasa anogo nungjisa (May 5) Bastar District kübok Naktoka yimdam alirtemi yimtsüng leper nung Khristan yimsü den sendaktepa asüpila sentong agia tasü mang remra tepsettsü ta Khristan kibong ka amokmerena liasü, ta Pastor Guptaram Kawasi-i metetdaksü. Iba yimtsüng nungji Hindu aser tribal yimsü amangertem timba lir

"Yimdaklirtem atema lemzüksüba leper nungji Bhima Kashyap (Khristan) tasü mang marentsüla ta yimdaklirtemi ashi, kechiyong pai bendanger yimsü (Khristan) amanger, ta parnoki aitsü," ta Pastor Kawasi-i metetdaksü.

"Khristan kibong dangji Hindu mesüra tribal yimya nung ang asüpila sentong agitsüla ta ashi. Yimdaklirtem jagi par kibong dang asüpila sentong agitsü atema tamangba yimsü meyiptsüla ta ashi," ta pastor-isa metetdaksü.

"Yim ozüng alema inyakra Kashyap'er kidang alir ajak tepsettsü ta parnoki Khristantemji amokmeren," ta Pastor-isa metetdaksü.

May 6 nü Khristantem jagi ADF India's Chhattisgarh Legal Aid Centre jaok, aser kobi melii Mardum police station nungi police ketdangser den village revenue officer aruba sülen ang nikongdang 4:00 ako meta asüpila sentong agiteta tasü mangji arem, ta pastor-isa shisem



China nung Fujian Province kübok Sansha jila nung aliba Gutong yimdam farm ka anasa Tenla ki ka noksa nung angur. Tan May ita nunga China nung Khristantem anema inyakra osang aika lir; item rongnung Tenla kidang nungi Kangki indoktsüba, Tenla kitem mita aoba aser Khristantem amokmerenba densema lir. Persecution watchdog- Bitter Winter osang ajanga ashiba agi, China linüki coronavirus tashidak prokba anema linük shibangba agientsü lia Communist ketdangsertemi maneni Khristantem Tenla ki anema inyaksü sentong lir.

ANOGO ABEN TSÜNGREM DEN

TANANG ASER TASEN

"Yimjung anogo nung pelaa liang, aser tüokrong anogo nung bilemdangang: Tsüngremi kata kata yanglu, oda nisungi pa sülen kechi ataloktsüar mebushitetsüsa" (Sayu. 7:14).

Mapang ka nung koda ka sensaka alir palakaji tanelaren tashi taitba alir ta angateta liasü. Tang ibaji melenshir radio, television aser sayutsüngiba sabang ajak nung azükaruba dang jembir. Azükaruba indang sayutsüngiri talila oa sayutsüngir, "Na kümzuka lira anema alitsü aser rongsen akatsü!"

Anaprongla tali aobaji tai. Tsüngremi par chirtem junga aliba aser sensaka aliba tuozük shidak yutsür. Laishiba nung Tsüngrem nisung meshidakji ajangshia mali. Pauli ashi, "Sensaka alitsü aser peria alitsü aji ni metet. Kechisarena nung aser mapa ajak nung, sünga alitsüa aser yaa alitsüa, jenti kaa alitsüa aser anünga alitsüa, iba miim Oji ni angazükogo" (Fil. 4:12,13). Tsüngrem nisungi tia ajak nung temulung süa Tsüngrem Tenüng asangtsü angazüker. 3 Yohan 2 nung kaa alitsü sayu, "Temeimba, ne tanela koda renloker aji oda ajak nung na renloka aser anema alitsü ni sarasademer. Tanela nung kwika sünga lir ashitsü makok.

Tsüngremi asenok tanela junga alitsü dang moatsüra temangji koda asütsü. Timba mokokmin aser sensak tia nung dang alitsü! Taseen Lai nung taochi indang Pauli jembir saka pai temalen raratep aser telunglen tetsüba aliba indang zülü (2 Kor. 7:5). Lazar shibai kotaker temoatsü angu aser pa ali taküm nung nungdak aser aya-tzura liasü.

Tamangji asen nungdak ajak angutsüba magic ka masü, mesüra sensak tia aser timtemji tamang nung tashi maitba tutetsüba ka masü. Ibri 11 nung tuzük shidak agütsüba sayur. Tamang ajanga parnoki agizükba aser tagütsübaa angu. Tamang ajanga azükaruba aser timtema angu. Tapu 11 ji junga zügang. Anüngdang koda alitsü mesüra aonung danga koda alitsü? (Lipok 1:5). Oh Tsüngrem, koda shisa taka!

Takümüji Tsüngrem chirtemi ajangshia tepela aser tejashi agi yangluba ka lir. Saka asenoki teperi aser sünga aliba taküm ka kanera asenoki takoa aser tananga metettsüla! (H.S. Rice).

O Tsüngrem, Nai agütsüba takümi alima nung tajung aser tamajung onok taküm lenmang nung ajanga aodang Ne shisatsü angatetsü onok dang sayuang. Amen.

PPEs alitsü atema UK nung Khristan charities aika longjemer

London, May 12, 2020: inyakertem aser iba tashidak agi Coronavirus tashidak anema shiranger anepalurtem atema tongbang tejaklen rarartem asoshi PPEs alitsütsü asoshi pound sen personal protective equipment (PPEs) alitsütsü atema senotsü lenmang bushitsü asoshi Khristian 7,000 bosa bendentetsü parnoki imlar, ta lai ashi.

Kasa fund nung jagisa charities aika longjemogo, ta coronavirus tashidak anema osang ka ajanga metetdaksü. raraba mapang nung asür staff tem kibongtema yaritsü.

Khristan charity- Ascension Trust leniba nung Churches Together Britain & Ireland, Christ Hospital Ministry aser Through the Roof densema Khristan charity aikati "Standing Together Community Appeal" nung shilem agir.

Dr Myers-isa Khristantem dang coronavirus tashidak anema tongbang tejaklen rarartem atema maneni sarasademjang, ta mepishia metetdaksü.

Royal College of Nursing Council nung züngsem, Dr Joan Myers-i Ato kilonser dang, nurse ka ama healthcare worker temi parnok timtem ashiba angatsüji tasak, ta shiogo.

"Aonung shia ni Tsüngrem dang parnok kümzükang aser len aniang ta sarasademtsür. Tsüngremi nurse tem nem tashi taseen agüjang ta asenoki sarasademtsüdi, kechiyong parnok-a nisung dang, anungji parnoki tashi nungdaker," ta lai ashi.

"Nurse temi kü dang parnoki iba teyariji (PPEs) mangur ta ashir. Parnok nem personal protective equipment (PPEs) shidak magütsür, anungji parnoki iba tashidak (coronavirus) menatsüa akok, ta parnok tetsüba nung dang alir. Ibaji dang masü parnoki iba tashidakki menazüker kidangi oa kibong züngsemtem nem-a menaloktsütsüa akok, ibaji parnok atema tetsübuttsüka lir," ta laisa ashi.

"Shirangertem anepalutsü atema onoki nursing mapa shim, ajisüaka yamai ajurutsü ta onoki bilema maliasü. Iba ya tetsübuttsüka lir, anungji Tsüngrem dang parnok nem tesünep agüjang aser tashi agüjang ta asenoki sarasademtsüdi," ta laisa mepishia metetdaksü.

May 12, 2020 anogo tashi nung UK nung coronavirus tashidak agi nisung 40,011 süogo.

Europe nung coronavirus tashidak agi tamajungba kongshiba linükji UK lir. Iba sülen Italy (nisung 30,739 asü), Spain (26,744), France (26,604) aser Germany (7,661) linüktem lir.

Coronavirus anema

OLONG PAITEP # 5455

	1				2	3			
4			5						6
						7			
	8								
	9			10			11		
						12			13
14									
						15			
		16							

TIPILEN		LANGTSÜNGLEN	
2. Sü jeplok	- (4)	1. _ _ _ _ i	- (4)
4. O agi merenshi	- (5)	3. Kasa masü	- (6)
7. Ayongküm li	- (5)	5. Nüchi masü	- (5)
8. Chiyungtsü mapang süiadok	- (4)	6. Tashi endok	- (5)
9. Tsüngrem den jembiba	- (9)	9. Langtem	- (5)
12. Saklok	- (4)	10. Anü malidang	- (6)
14. Samaba mebushitet	- (5)	11. _ _ _ _ _ kibur	- (5)
15. Mejanga onü	- (5)	13. Tebur tembar tsüngda	- (4)
16. Tzü shiruru ka	- (4)	jatepba	- (4)

OLONG PAITEP # 5454 TELANGZÜBA

TIPILEN :		LANGTSÜNGLEN :	
1. Lemsä, 3. Osang, 5. Mezüng,		1. Lamén, 2. Sangken, 3. Omen,	
6. Agi, 7. Süra, 8. Tebutem,		4. Asüküm, 7. Sendong, 8. Tejang,	
9. Amen, 12. Odi, 13. Asayar,		10. Tanga, 11. Tazü.	
14. Angsü, 15. Agima.			



TANÜBO NAI LANGZÜANG

Q. 2020 küm tang tashi nung koba linük-i Asian Development Bank tsüngdang sen tiemtiba apua lir ?

[A] China [B] India [C] Pakistan [D] Philippines

_____ (Taruba adok nung onoki langzütü)

YASHI ADOK TELANGZÜBA : 2019

Tepela Tasoba Anogo

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

1. Tenüng :
 2. Tasoba anogo:
 3. Küm : 4. Class :
 5. School :
 6. Talidak :
 7. Salem osang :

NAI-A YA METETTER MA?

ACTOR RONGNUNG SEN TIMTIBA AAZÜKBA ACTOR KAR: 2020

1. Shah Rukh Khan	: (net worth : \$600 million)
2. Tom Cruise	: (net worth : \$570 million)
3. George Clooney	: (net worth: \$500 million)
4. Mel Gibson	: (net worth: \$425 million)
5. Adam Sandler	: (net worth: \$420 million)
6. Amitabh Bachchan	: (net worth: \$400 million)
7. Jack Nicholson	: (net worth: \$400 million)
8. Sylvester Stallone	: (net worth: \$400 million)
9. Arnold Schwarzenegger	: (net worth: \$400 million)
10. Clint Eastwood	: (net worth: \$375 million)
11. Jackie Chan	: (net worth: \$370 million)
12. Keanu Reeves	: (net worth: \$360 million)
13. Sean Connery	: (net worth: \$350 million)
14. Tom Hanks	: (net worth: \$350 million)
15. Michael Douglas	: (net worth: \$300 million)
16. Will Smith	: (net worth: \$300 million)
17. Robert Downey Jr	: (net worth: \$300 million)
18. Robert De Niro	: (net worth: \$300 million)
19. Brad Pitt	: (net worth: \$300 million)
20. Leonardo DiCaprio	: (net worth: \$260 million)

SUDOKU # 5497 TELANGZUBA # 5496

	8			3	5	2			4	7	8	9	2	6	3	1	5
	1			9			8		1	3	2	4	5	8	6	7	9
	7	4				1			6	5	9	1	3	7	8	2	4
7	4				1	3	2		7	6	1	5	8	3	4	9	2
9					2	8		4	9	4	3	6	1	2	5	8	7
	6					5	9		8	2	5	7	4	9	1	6	3
4	2					7	1		2	9	4	3	6	1	7	5	8
3			5	2	7		6		5	8	6	2	7	4	9	3	1
8				1					3	1	7	8	9	5	2	4	6

OJANG LUTEP # 5045

INTEDRTANGEEM :

HIBOCHISA :

AIG :

ITANSÜ :

KASA :

ERTEHIKASÜLAKM :

SHIBMHIASKOA :

GIJA :

RNPAOK :

ÜSTSÜAMATS :

OJANG LUTEP TELANGZÜBA # 5044

TEMESHIPUR TEMELENI TARIBI TAKUTET MESÜK SAKA
 TEMENENPUR TEBILEBAJI TAGIDAK MAKA

TAN HOPTA ATEMA - KOMA SÜLA ?

Q. Tashidak nokdangtsü atema taruba June ita tashi Assam nungi jangotsü aser gari totzü abenba garitem kata Nagaland-i matudaktsui nokdang nunga koma süla?

India nung 6000 dak tema anir aruogo

New Delhi, Monupii/May 12 (Agencies): Air India aser Air India Express nati Vande Bharat mission kübok anogo 5 tsüingda tayimtsü 31 ben senzüa bendanglen sabanga aliba aliba India nung 6,037 anri aruogo, ta Ministry of Civil Aviation-i Mongolbarnü metetdaksü.

May 7 nungi 14 tashi nung

Air India aser Air India Express tayimtsütem 64 ben senzüa linük 12 nung sabanga aliba India nung 15,000 shi anir arutsü sentong lir.

Coronavirus tashidak prokshia meyoktsü asoshi March 25 nü nungi tenzüka India ajunga mokdang lir. Tang tashi nung iba tashidak

ajanga India nung nisung 2,290 shi süogo aser nisung 70,000 dak tema menaogo.

"May 7 nü nungi tenzüka Vande Bharat Mission kübok Air India aser Air India Express tayimtsütemi India nung 6,037 anir aruogo," ta Civil Aviation Ministry-i sangdong ka ajanga Mongolbarnü metetdaksü.

Taoba Chhattisgarh CM Jogi temang kanga mejungi lir

Raipur, Monupii/May 12 (Agencies): Taoba Chhattisgarh chief minister Ajit Jogi temang kanga mejungi lir aser pa ventilator support maneni agidar, ta Mongolbarnü doctor temi metetdaksü.

Jogi indang neurological activities ji 74 lir koba maliba den kasa aser pa coma nung dang lir. Doctor temi "audio therapy" agütsü tenzüko aser earphones ajanga pai meimba ken tem angadaksü tenzüko.

Jogi ya temulungiang aser tangola sashiba nung timtem

adoka May 9 nü Shree Narayana Hospital-i anir ao, Doctor temi ashiba agi, Jogi indang windpipe nung tamarind tejang ka sepdaka ayu.

"Jogi temang kanga mejungi lir aser pa tang tashi coma nung lir," ta mozüki Medical Director Dr Sunil Khemka-i ashi.

"Pa indang neurological activities tem mali den kasa. Doctor temi pa tekolok shia arudaksütsü asoshi merangdangdar. Onoki pa nem pai meimba ken tem angadakja 'audio therapy' agütsü

tenzüko saka tang tashi takom monguteti lir," ta paisa ashi.

Jogi temulungiang, blood pressure aser urine output ajak aziokteta lir, ta pai shisem.

Jogi ya bureaucrat aliba nung yimden yimsüsür ka aküm aser Congress sorkar mapang pa 2000 küm November ita nungi 2003 küm November ita tashi Chhattisgarh indang mezüngbuba chief minister ama inyakogo.

Pa 2016 küm Congress toktsü aser pai Janta Congress Chhattisgarh (J) tenteta liasü.

India nung Covid-19 tashidak menar alir nisung 70,756 jungogo

New Delhi, Monupii/May 12 (Agencies): India nung Monoglarnü tashi nung Covid-19 tashidak agi asür nisung 2,293 jungogo aser nisung 70,756 dak iba tashidak keta aliba putetogo. Hombar anepdang 8:00 ako nungi ghonda 24 tsüingda nisung 87 süogo aser nisung 3,604 dak iba tashidak putetogo, ta Union health ministry sangdong ka ajanga metetdaksü.

Linük nung tang iba tashidak agi shiranga alir nisung 46,008 lir aser nisung 22,454 anepogo, kasa mapang nung nisung ka tangaleni ogo, ta ministry-i ashi.

"Anungji tang tashi nung shiranger shilem 31.73 bo anepogo," ta health ministry ketdangser kati ashi.

Hombar anepdang nungi iba osang agütsüba mapang tashi nung nisung 87 sür liasü; asürtem rongnung Maharashtra nungi 36, Gujarat nungi 20, Madhya Pradesh, Tamil Nadu, Rajasthan aser Uttar Pradesh nungi trok-rok, West Bengal nung pongu aser Haryana o Jammu and Kashmir nung nisung kaka süogo.

Nisung 2,293 sür aliba

rongnung Maharashtra nungi nisung timba; 868 süogo aser parnok sülen Gujarat (513), Madhya Pradesh (221), West Bengal (190), Rajasthan (113), Uttar Pradesh (80), Delhi (73), Tamil Nadu (53) aser Andhra Pradesh (45) asütsü. Karnataka aser Punjab nunga nisung semer-kaka süogo.

Telangana nung nisung 30 asüba metetdaksüogo, Haryana nung 11, Jammu and Kashmir nung 10, Bihar nung 6 aser Kerala nung nisung pezü süogo. Maneni Jharkhand aser Odisha na nunga Covid-19 tashidak agi nisung asemsem süogo aser Himachal Pradesh, Assam aser Chandigarh nunga nisung anana asüba osang angazükogo. Tang tashi nung Meghalaya aser Uttarakhand na nung nisung anana asüba osang agütsüogo, ta ministry data ajanga sayuogo.

Health ministry indang website nung shia aliba agi, asür shilem 70 bo comorbidities agi asür. Asür nisung 70,756 nung bendangertem densema lir.

Maneni tanep inoktsüba health ministry indang data ajanga ashiba agi, Maharashtra

nisung tashidak menar alir timba lir. Iba state nung nisung 23,401 dak tashidak agi kongshio aser parnok sülen Gujarat (8,541), Tamil Nadu (8,002), Delhi (7,233), Rajasthan (3,988), Madhya Pradesh (3,785) aser Uttar Pradesh (3,573) asütsü.

West Bengal nung tashidak agi atonger nisung 2,063, Andhra Pradesh nung nisung 2,018, Punjab nung nisung 1,877, Telangana nung 1,275, Jammu and Kashmir 879, Karnataka 862, Bihar 747 aser Haryana nung nisung 730 dak tashidak tongogo.

Tang tashi nung Kerala nungi coronavirus agi shiranger 519 potetba metetdaksüogo, Odisha nungi 414, Chandigarh nungi 174, Jarkhand nungi 160, Tripura 152, Uttarakhand 68, Assam 65, Chhattisgarh aser Himachal Pradesh 55 (each), Ladakh 42, Andaman and Nicobar Islands 33, Meghalaya 13, Puducherry 12, Goa 7. Manipur nungi nisung ana, Mizoram, Arunachal Pradesh aser Dadra and Nagar Haveli nung nisung kaka dak iba tashidak aliba taoba mapang putetogo.

A Tribute to Late W. Mapala Aier

28-02-1927 • 08-05-2020

Onok dang kanga meimba Oya, Oja, Otsü, Onok atema na Nungja Petinu.

Ne ali taküm maparen otsütemji onok asoshi mesamaba senmang.

Nai ajanzükba shisatsü, konang, rongsen, rizünga yudi süra kok-a liaka, nai meimbatem aser nungdakba purtem den teka sala a lemsatsep.

Iba tamaren senmang nai onok nem doktsü nung miima atanger aser tasü aieter.

Tia ajak nung tamang kateta temeim nung alitsü nai sayu.

Atangji ne tajungtiba nai onok nem agütsüogo.

Ali taküm tongpang tatempanga tangula den raradanga "Menüremloksüogo".

Akümlirtem atema ibaji Tesünap aser Tashi.

Jokola, nai meimba Kibuba den teti tatem makadak anisüngzüka lir ta meteta onok tip tema lir.

Pilaogo ni! Saka ozü mulung nung teti alitsü.

Nai Meimbatem



Hyderabad, May 12: Hyderabad nung Mongolbarnü Nursing Day amungba mapang Krishna Institute of Medical Sciences (KIMS) nungi MD Dr Bhaskar Rao-i, COVID mapa nung sodaka aliba nurse tem nem tetushi agütsüba sülen sentepa aliba lokti ayongzüka o jembiba noksa nung angur.

Train nung senzürtemi Aarogya Setu App amshitsüla

New Delhi, Monupii/May 12 (Agencies): Indian Railways-i Hombarnü special train tem, koba Mongolbarnü nungi senzü tenzüko, iba train nung senzürtem dang sorkar indang Aarogya Setu mobile application install asütsü asoshi ajungshia liasü, ajisüka iba app inoktsüba ya kechi südir süka inaktsüba inyakym ka kümdaktsüogo. Delhi nungi yimti tongtibangtemi aoba train pair 15 atema tetuyuba agütsüba nung iba mobile app kechi südir süka inoktsü asoshi shia mali saka railway ministry-i ayatrem (12:24 am) nung tweet ka ajanga iba inyakym ya kechi südir süka inaktsüba inyakym ka kümdaktsü.

"Indian Railways-i passenger train services kar senzüdaksü tenzüksü. Train nung senzürtem ajaki parnok ainei mao tsüingda Aarogya Setu app download asütsü nungdaker," ta tweet nung shia lir.

Source balala ajanga ashiba agi, Ato Kilonser Narendra Modi aser chief ministers tem

senden amenba sülen Union Ministry of Home Affairs (MHA)-i osang agütsüba dak ajemdaker iba inyakym ya kechi südir süka inaktsüba maparen ka kümdaktsü.

Pei phone nung iba app inoka maliba passenger tem dang parnok station-i aruba sülen app inoktsü asoshi asüingdangtsü akok, ta parnokisa ashi. Ajisüka iba app koda benoka inaktsü, iba indang osang tejangja agüja mali, ta ketdangseri ashi, kechiyong Supreme Court-i tetuyuba agütsüba nung iba app kechi südir süka amshitsü asoshi tuyuba ya ozüing alema lir, ta metetdaksüogo.

Aarogya Setu app ya tang tashi nung smart phone crore 9.8 nung inoka lir aser COVID-19 tashidak prokshia meyoktsü asoshi sorkari iba ya contact-tracing aser medical tsütsü osang balala agütsütsü asoshi amshir. MHA-isa, COVID-19 tashidak agi menentsür aliba tesemtem nung alirtemi kechi südir süka iba mobile app inoktsüla, ta shio.



May 12, 2020: Linük ajunga mokdang aliba mapang yimti tongtibangtem sendakteptsü asoshi passenger train service lapokba sülen nüburtem New Delhi Railway Station-i aitsü asoshi tarensena nokdaker aliba noksa nung angur.



Moscow, Monupii/May 12: St. Petersburg, Russia nung St. George Hospital kima Emergency Service ketdangsertemi tangokba noksa ka yangi angur. Mongulbarnü iba mozüki nung artificial ventilation machine inoka aliba shiranger pongu mi agi rongseta asü.

UK nung COVID-19 agi asür nisung 38,000 dak tema süogo

London, Monupii/May 12 (Agencies): May ita tetenzüklen tashinung United Kingdom nung COVID-19 agi asür nisung 38,000 dak tema kuma Europe nung tamajungtiba lir, aser iba ajanga Ato Kilonser Boris Johnson-i coronavirus dak sendakba ketdangsüba nung tasüngdangba arur.

National Statistics for England and Wales indang office ajanga sangdongba nung May 3 tashinung United Kingdom nung asür 38,289 liasü - koba hopta ka tsüngda nisung 6,000 jungnüa asüba sayur, ta Reuters ajanga anogoshi bendenba death registrations data ajanga ashir.

Yimya balala amshia züngdangba agi danga linüktem den metem dangtsü tasak, aser alima nung nisung 285,000 dak tema tepsetba tashidak wara agi kanga mejungi kongshiba linüktem

rongnung Britain ya ka lir ta jangjatet.

Britain nung tanem tanemi mapa inyak tenzüksü asoshi Johnson-i sentong yanglur anogo ka lir iba data ya adok. Ato kilonseri kidang yangluba face mask agitsü ajungshi aser coronavirus mechi tenokdangba balala agüja aliba agientsü merangba agi aika mangmangteper.

UK nung nisung aika asüba ajanga Johnson dangi tebilemtsü khuret tali arur, aser anempongba ozüng benoktsü asoshi tali menu, nisung aika khen nung tendangtsü asoshi tali menu aser mozüki tem nung protective equipment peria agütsütsü asoshia kanga menu, ta opposition party temi aitsür.

Iba data ajanga care home tem nung atalokba temai adok, kong virus yagi kanga mejungi kongshia lir.

"Care home tem nung

kanga meilongi iba tashidak agi asüba ajema akümer," ta ONS statistician Nick Stripe-i ashi.

"Mapang kabo mozüki nung asüba dang nungi care home tem nung timba asüba ni bilemteter," ta pai ashi.

Tang England aser Wales nung COVID-19 agi asüba ajak sendeper shilem asembo care home tem nungi lir, ta sayur.

COVID-19 nungi mozüki tem kümzüksü asoshi yangluba sentongtem agi care home tem nung kanga mejungi kongshi, ta Reuters Special Report ka taoba hopta adoka liasü.

Sorkari anogoshi asüba indang sangdongba ama masü, Mongulbarnü sangdongba nung COVID-19 agi asüba südi ta temolung melemi alirtema densema lir. COVID-19 ya tangola junga mesashitetba tashidak ka lir, koba novel coronavirus agi adokdaksür.

Afghanistan: Prangbong bena alirtemi mozüki ka amak

Kabul, Monupii/May 12 (Agencies): Kabul nung sorkar meyong kinü tanur asoba mozüki ka nung Afghan sepaitemi nisung ter dak tema anizüker oa aser iba mozüki nung lendong agütsür prangbong bena alir nisung asem tepset, ta interior ministry odongtari ashi.

Barchi Hospital nung anepdang lendong agütsüba mapang nisung pezü tepset, ta interior ministry ajanga Mongulbarnü sangdong ka nung ashi.

Sepaitemi iba tesem muketbang aser mozüki nungi tetsür aser kinü tanur 80 dak tema anizüka liasü, koba angadi teyari agütsüba Doctors Without Borders (Medecins Sans Frontieres, mesüra MSF) ajanga tanur asoba clinic ka amenoka lir.

Lendong agütsür nisung asem police uniform agir Kabul kübok Dashti Barchi tesem nung aliba mozü kidangi ai aser grenade mereplokja injang khaloktsü, ta sorkar ketdangsertemi ashi.

Iba mozüki nung kinü tanur anepalur takotet kati osangbener dang ashiba agi, Dashti Barchi nung mozüki kishizüng nung ola tulu adoka apokba angashi, kong Shia kin

timba alir aser taoba mapang parnok dak ISIL (ISIS) telungpur temi lendong agüja arur.

"Iba mozüki nung shiranger aser doctor temi sünga liasü; iba mozüki telung nung alir ajak aoksatep," ta doctor ka yagi ashi.

Sorkari amenokba yipten 100 aliba mozüki ya MSF ajanga yarir, ta Ministry of Public Health nung odongtar, Wahidullah Mayar-i ashi.

Ita ishika tsüngda Afghan yimtiba, Kabul nung lendong tulu aika ataloka arur, koba ISIL teloki tenüng agia lir.

Hombarnü sepaitemi ISIL züngsem asem pua lir ta ashi, aser item rongnung regional leader ka dena lir, ta ashir.

Taoba hopta sepaitemi ISIL cell nungi züngsem kar tepset aser kar apu, aser item yagi March ita Sikh nung tekülem ki amakba dena Kabul nung lendong aika agüja arura liasü, ta ashir.

Hombarnü lenmang tezülen bomb poklokja civilian pezü yirutsüba ya parnoki tenüng agia lir.

United States-i anir yimjung ken o jembia Taliban den February ita sepaitem anizüker aotsü tezüngzüktep agiaka iba telok yagia Afghanistan tesem ajungalen azüdokshia arur.



Central China indang Hunan Province kübok Changsha nung aliba kindergarten ka nung tanurtem chiyongtsü achiba noksa nung angur. Changsha nung Hombarnü nungi kindergarten lapok tenzükogo.

Yemen sorkari separatist tem den raratsü nangzüker

Aden, Monupii/May 12 (Agencies): Coronavirus tashidak wara pokteta aliba mapang Yemen nung mapang talangka raraa aruba nung ano rara tasen ka tenzüksü akok ta nüburttem tebilemtsü akar, kong linük balalai agizükteta aliba sorkari United Arab Emirates-i nungitba separatist tem den south nung raratsü, ta shiogo.

April 25 nü Southern Transitional Council (STC) ajanga rong anenba yimti, Aden aser anasa aliba tesemtem nung par sasa yimsü asütsü sangdong, aser Saudi Arabia-i busemba sorkar den rara tenzükshitsü amokmeren. Yemen nung 2015 küm Houthi telungpur den raratsü asoshi Saudi Arabia-i mitkar teyari

agütsü. Foreign Minister Mohammed al-Hadhrami-i Mongulbarnü ashiba agi, sorkar aser linük balalai STC dang pari sangdonga aliba melenshitsü ajungshiaka memolung.

"STC anema linük wazüka ayutsü, tentet balala aser nüburttem kümzükä ayutsü atema mitkartemi nüngdakba mapa ajak inyaksü," ta pai ashi.

Al-Hadhrami-i STC dang Riyadh tezüngzüktem mapa kuma inyaksü ajungshi, kong STC-i August ita Aden agiba sülen tensa azüoktsü mechi Saudi Arabia tiyongi ia tashi lemsatepa yimsü asütsü atema November ita züngzüktepa liasü.

South tsütsü aser talisa Abyan province nung mitkartem inyakyim atema telok anaprongi kati ka dak tai tongloktsüteper.

Hombarnü STC lenir Aidarous al-Zubaidi-i south tsütsü aliba sepaitem dang renema alitsü ayongzük aser nüburttem dang pei linük kümzüksü ajungshi.

Hombarnü telok ana ya Abyan province yimtiba, Zinjibar tezülen khatempa liasü, kong sorkar busemba sepaitemi amak tenzük, ta osang ajanga ashi.

STC ketdangser Nabil al-Hanachi-i osangbener dang ashiba agi, par sepaitemi parnok anendaktsü aser aika tepset.

Pai ashiba agi, al-Islah telok indang military wing ajanga

lendong ya agütsü, koba sorkar den sendaktepa lir.

Medical osang ajanga ashiba agi, sorkar meyong sepai ana asü aser 13 yiru, aser kasa mapang separatist ana asü aser 11 yiru.

Yemen nung küm pongu tashi raraba mapang linük indang healthcare system raksatsü aser nisung aika ayawara tia nung yutsü.

Coronavirus tashidak wara nung temolung agütsütsü mechi United Nations-i ajungshiba ama Houthi nung den raraba Saudi-i aniba teloki khen atema rara anentsü sangdong, saka par tsükchirtemi iba sangdong magizük aser maneni azüdokshir.

2014 küm tatemlen Houthi

nungertemi linük yimtiba, Sanaa agiba sülen linük balalai agizükteta aliba sorkar atema Aden ya khen asoshi yimtiba ama amshia arur.

Iba linük nung nisung 58 dak coronavirus tashidak puteta lir aser item rongnung timba Aden nungi lir, kong STC den mangatetep aliba ajanga iba tashidak wara azüoktsü merangba nung tetsükdaksü ajurur, ta sorkari ashi. Kasa mapang STC-ia sorkar ya ochimashi agi sünga lir aser yimsü asütsü metemsü, ta aitsür.

Tesüiba küm trok tsüngda Yemen nung telok balala tsüngda raraa aruba mapang civilian tem timba sür nisung meyirijang aika tepsetogo.

Wokha nung COVID-19 Horticulture Drive sentong agiogo



Wokha, Monupii/May 12, 2020: Mongolbarnü Wokha DC conference hall nung Commissioner & Secretary Horticulture & Women Resource Development, Anenla T. Sato, IAS-i Horticulture special drive sentong dak sendakba indang nung ajemdaker jembiba mapang tangokba noksa ka yangi angur.

Wokha, Monupii/May 12, 2020 (TYO): Mongolbarnü DC conference hall nung

Department of Horticulture Government of Nagaland ajanga 'Grow More-Produce More-Earn More' omen nung ajemdaker Special Horticultural Drive sentong den atongsema department ketdangser tem den shisadokten senden ka ayongzüka agiogo, ta sangdong ajanga metetdaksü.

Iba senden nung Commissioner & Secretary Horticulture & Women Resource Development, Anenla T. Sato, IAS-i jembiba mapang lai ashiba agi, alima ajunga asungba wara - COVID-19 ajanga alima tesem balala nung nisung million 135 shi taji-tajemtzü peria mengutei aya-tzüra tia nung lidaki aser taküm küm tatem tashi nung chiyongtsü peria mangur nisung million 130 talila akümstsü.

Ibayongji, aluyimertem dang tsünüsembongtsü timba yoktsü ajungshitsü asoshi State Sorkari kanga dang nendak nendaka asalentong balala yangludat aser süngolemba, spices,

süngjanglijang, naro aser tanga tsünüsembongtsü lu ayimertem atema Standard Operating Procedure (SOP) yanglutsüogo, koba ajanga horticulture dak sendakba wadang balala nung aluyimba maparen kümzüka ayuba den külemi iba virus prokshia aotsüsa akümba lendongbatem ajemdaksütsü, ta Sato-i shisem.

Sato-isa, department ketdangsertem aser tanga sendaktepa aliba department tem dang süngjanglijang, süngolemba aser spices tapu balala lu ayimer indang osang aser data bendentsü asoshi ajungshi, ajiasünungang aluyimertem ajangzüksü asoshi department-i aslentong tajungtem yanglutettsü aser shishilembaba inyakym tsütsü terenlok alitsü.

Kasa senden nung Director, Horticulture, Dr. R. Elithung Lotha-i ashiba agi, alima ajunga asungba wara ajanga maparen ajak anentsüsa/shibangtsüsa kümogo aser iba lockdown ya maneni dang atsülanga aonungbo, aluyimertem kisüng dang masü saka, külem

sensopurtem-a kanga dang mejungi tim atemtsü. Ibayongji ajak peridaksütsü aser rongsenkettsüng tsütsü terenlok lidaksütsüsa aluyimertem dang tsünüsembongtsü timba yoktsü aser iba den külemi aluyimba wadang maneni inyaktsü ajungmesotsü asoshi department-i tetuyuba kar renema lir.

Nagaland nung tsünüsembongtsü jenti adoker aser ali rongsen peria aliba state ka lir, ta Dr.R.Elithung-i shisem aser state nung chiyongtsü talubosa adokdatsütsü aser ibaji ajanga rongsenkettsüng tsütsü ajangzükdaksütsü atema Tsüngremi moatsüba ali rongsen tem tim nung ketdang asütsü asoshi aluyimertem ajungshia liasü.

Iba sentong nung Commissioner & Secretary Horticulture & Women Resource Development, Anenla T. Sato, IAS den Jt. Director Horti, N. Jerry Patton, Dy. Director Dr. Moa Walling, Dy. Director Mesetuo Pienyu aser HEA Thungchobeni Kikon nung aruagi denogo, ta kasa sangdong ajanga metetdaksü.

Medziphema nung sanitization drive agiogo



Medziphema, Monupii/May 12, 2020: Alima ajunga asungba Covid-19 wara dak sendakba nung, Mongolbarnü Medziphema Administration den ICAR Mithun Jarnapani longjemer Medziphema nung sanitization drive sentong ka ayongzüka agiba mapang agiba noksa yangi angur.

Medziphema, Monupii/May 12, 2020 (TYO): COVID-19 dak sendakba nung tekümdangtsü meratem agia, Mongolbarnü Medziphema Administration den ICAR Mithun Jarnapani longjemer Medziphema tesem nung sanitization drive sentong ka agia liasü.

Iba drive sentong ya ICAR Mithun, Dr. Koku Khati-i tenzüksü aser kasa mapang pai

achaayanga mesen tepsettsü atema mozützü ajak abensa agütsü.

Iba wara prokshitsü atema lendongbang nung aliba tesemtem aser Community Health Centre, MTC, ICAR Mithun Jarnapani densema sub-division nung sanitization drive agiba ajanga ADC Medziphema aser ICAR Mithun Jarnapani na longjemer

kanga meranga tongtibang shilem ka agiba mapa agi sayuogo.

Medziphema Town kübok tesem balala nung sanitization drive aotsü atema Nagaland Fire and Emergency Service Chumukedima den ICAR longjemer inyak, kong water wash pump tem ajanga item mozützü khalokja liasü, ta sangdong ka ajanga metetdaksü.



OFFICE OF THE

AO SENDEN

H.Q: MOKOKCHUNG : NAGALAND

Ph: 0369-2228896/ e-mail: aosenden@gmail.com

Date: 12/05/2020

AYONGZÜKER

COVID-19 wara tashidak tongpang anema India lima rangben Lockdown sür liyonga arudang, Tsüngrem taochi agi asen nüburtembo Naga lima aser tesem balala nung alir ajak iba tashidak wara agi metongi kümzüka liyonga arudar. Iba Lockdown ajanga tongtipangsa asen nübur India lima tanga State aser jila balala nung alirtembo meshiteta timtem tekangshi jenti ajuruba osang angashidang Ao Sendeni nenok den aria bilemba lemsar aser akok tashi Sorkar den shisalemsatepa nenok timtem nung yariteptsü asoshi maneni maparen ajak nung tongtepratepa inyakdagi. Tang ama tensa tia ka nung bendang lima nung koda masü timtem jenti agia pei nübur aser kinunger adianu den pila alitsübaji kanga tasak. Ajioda süaka, asen lima aser asenok ajak iba tashidak wara nungi kümzüka alitsü mechi nung asen nübur shirnoksa Nagaland atena or bendang lima tang tashi nung maruteti lir iba wara den raraba tongpang ya süngjema mao tashi nenoki timtem aremzüka pei kidangi meshilangi pei alidak dang kümzüka ata ali tajungba asütsü ta Ao Sendeni Ao sünak abener ajak dang ayongzüker.


(Chubawati Longchar)
President


(Imtipokym)
Secretary

Tuensang DTF COVID-19 pur senden amen

Tuensang, Monupii/May 12, 2020 (TYO):

Mongolbarnü, Tuensang DC Conference Hall nung COVID-19 tensa asadangtsü asoshi shima yutsüba Tuensang District Task Force-i tribal lenir ajak den senden ka ayongzüka agiogo. Iba senden nung Tuensang Deputy Commissioner, Kumar Rannikant mendenti liasü, ta sangdong ka ajanga metetdaksü.

Iba senden agiba mapang, district nung tanü tashi quarantine centre balala nung maparen achaayanga inyakba aser tanga tesem nungi state-i arurtem indang osang dak sendakba nung jembiba.

COVID-19 dak sendakba nung agütsüba tetuyuba aser ozüng tem nung anidaka pei pei tasoli bushia arur lisopurtem atema inyakym achaayangtsütsü aser tribal volunteer temi administration, police aser medical tenzüka wadang nung alirtem yaritsü asoshi senden nung jembishinüa liasü.

Tribal line quarantine centre temji yamai alitsü:- Chang kin atema Tuensang Town nung institutional quarantine centre ana; Khiamniungan kin atema Tuensang HQ aser Noklak nung quarantine center ka ka; Sangtam kin atema Chari aser

Tuensang nung ka ka aser Yimchunger kin atema Tuensang HQ aser Shamator nung quarantine centre ka ka alitsü.

State adena or alirtem, shirnok Tuensang-i arutsü tebilemba lir, parnok nisung shia dang district-i arunüba aser quarantine centre tem nung amungtsü asoshi tebilembatem asüngdangtsü asoshi senden nung teloki lemteta liasü.

Iba den külemi, pei pei talidaki maruteti alirtem pei district bushia arutettsü atema ano maongka ka lapoktsütsü asoshi state sorkar dang mepishitsü ta teloki lemtetogo.

Shishilembaba tesem nung nüburtem aritepa lijaliyongba paidokdaksütsü aser tongtibangsa social distancing tetuyubatem timi anidaksü asoshi Tuensang district nung lijaliyongtsü asoshi anepdang 7:00 ako nungi nikongdang 2:00 ako tashi dokantem lapokdaksütsü atema senden nung lemteta liasü.

Tang ama tensa ka nung, meimchir dang aria bilemba mulungsentsü sayuba maparen dak sendakba nung, Tuensang district kübok para ki nung alirtem dang sen adoktsü asoshi ki kiburtem dang mepishitsü, ta senden nungsa teloki lemtetogo, ta kasa sangdong ajanga metetdaksü.

Tripura nung aayanger... (Tapak 3 nungi...)

Sangeet-ia iba tesem nung alirtem dang Debnath dak iba wara mali ta angateta ashi, saka anogo 14 atema institutional quarantine nung pa anepaluba sülen ang par kidangi aitsü asoshi melatsü, ta kiyongertemi ashi.

Ibayongji, health staff temi Debnath ya quarantine centre-i anir ao. Sangeet-ia ashiba agi, "Debnath ya anogo 14 atema institutional quarantine nung ayutsü kecha nungdak

madoker. Pa dak iba tashidak meputet aser pa ya par kidanga quarantine süa mongtetsü, saka kiyongertemi kanga sashia nokdakba ajanga pa ya institutional quarantine-i anir aotsüsa kümadok."

India ajunga shibangtsü ozüng magütsüdang, Debnath ya Agartala nung nija shishilembaba tesem ka nung inyaker, pai tebu meinoktsütsü atema Silapathar, Assam nung pa teti tambusang'er kidangi ao.

FIFA U-17 Women's World Cup asayatsü anogo sangdongogo

Monupii/May 12, 2020 (Agencies): Coronavirus tashidak pokteter aliba ajanga FIFA U-17 Women's World Cup India 2020 koba thinenogo, iba asayamung ya 2021 kum February-March nung asayatsü lemtetogo, ta FIFA-i sangdong ka ajanga metetdaksü.

FIFA-Confederations Covid-19 Working Group tetuyuba dak ajemdaker Bureau of FIFA Council-i India nung U-17 Women's World Cup taruba kum February 17 nungi March 7 tashi asayatsü asoshi telemtetba agi.

Kasa sangdong ajanga ashiba agi, anogo melenshiaka eligibility criteria tem kasa dang asütsü aser 2003 kum January 1 nü aser iba masüdag asor asayartem aser 2005 kum December 31 nü mesera iba

masüdag asortem iba asayamung shilem agitsü asoshi melatsü.

Euro 2020 nunger ama taoba mapang sangdongba asayamung tenüng ama iba asayamung tenüng agitsü asü kum tasenba inoktsü, iba indang tang tashi telemtetba agia mali.

"Iba asayamung ayongzuka agitettsü asoshi imlaa atar, aser India nung tetsür football asaya renloktsü asoshi iba ya sabang tajung ka asütsü," ta Local Organising Committee (LOC)-i ashi.

"Asayamung asayatsü shimmer aliba yimitemi tang tashi kanga bendanga agüja inyakogo aser asnogo tasen sangdongba atema pelar, kechiyong iba ajanga renemshitsü asoshi mapang peria agütsütsü.

"Asayamung dak sendaka alirtem ajak health aser kumzuka toktsütsü asoshi temulungdang yur Ministry of Youth Affairs and Sports densema stakeholder tem ajaki iba telemtetba pusemogo. LOC-i maneni FIFA den longjemer inyaksü aser iba asayamung ayongzuka asayatsü onok bendanga agütsür lir," ta kasa sangdong ajanga metetdaksü.

Asayamung methinen tsüngda Asia nung dang qualifying asayar liasü aser Japan o North Korea na qualify sür liasü.

Alima ajunga wara agi asüngba ajanga Africa, Europe, Oceania, South America, aser Central, North America aser Caribbean nung qualifying asayamung masayateti lir.

IPL thitsüba ajanga USD billion tesadangka akoksatsü akok: Arun Dhumal

New Delhi, Monupii/May 12 (Agencies): Alima ajunga asüngba coronavirus wara süshia maoba ajanga takum kum Indian Premier League asayamung masayatetsüsa kumogo, aser iba ajanga Indian Cricket dollar billion tesadangka akoksatsü akok, saka asayartem taa ajema agütsütsü asoshi ano telemtetba magi lir, ta ketdangser kati ashi.

Takum March 29 nü nungi tenzuka asayatsü aliba IPL asayamung ya aiben dang thija aser anogo atsülangja aruba sülen, tang alima nung jenjang tulu aketba iba Twenty20 asayamung ya mezüng thitsür asütsü.

2020 kum IPL thitsüba ajanga rongsenkettsüng tsütsü tetsükdaksü tulu ajurutsü akok.

"Revenue nung takoksa tulu adoktsü ama BCCI-i asadangtetter. IPL asayamung ya masayatetsüsa akum nungbo, sen billion 40 (\$530 million) jungnuaka mesüra timba akoksatsü akok," ta India nung Board of Control for Cricket, Treasurer, Arun Dhumal-i ashi.

Tanga linüktem ama, India nunga international saisapongtem tenzükshitsü asoshi yongya atadar, saka sorkar tetuyuba aser ozüng nung anidaktsüba dak alaka, tanga lenmang kecha mali.

"Takum kum IPL asayamung asayatsü mesüra masayatsü atema onoki telemtetba ka agia mali," ta Arun-i ashi.

March ita India aser South Africa na tsüngda one-day international series asayamung-a thitsüogo, saka IPL, koba 2008 kum tenzuka liasü, iba asayamung ajanga BCCI revenue nung kanga nungitter aser kasa mapang kum ka nung India nunger rongsenkettsüng nunga iba asayamung ajanga billion dollar 11 dak tema ajangzüktsür ama asadangtetter.

"Asayatem nung tamakok angubatem jung junga metetba sülen ang revenue nung takoksa aluba tejangja onoki asadangtetsü," ta Arun-i ashi.

Taoba kum IPL asayamung jenjang ya billion dollar 6.7 liasü, ta Duff ase Phelps financial consultancy-i asadangtetter.

India indang broadcaster Star Sports-i 2022 kum tashi TV rights' atema million 220 dak tema agütsüogo. Ajisüaka, osang ajanga angazükba agi, 2020 kum kisüng nung million 400 indang revenue ajangzüktsü asoshi nukla yur inyakdar.

COVID-19 ajanga alima tesem ajunga nung maparen shibangba ajanga, national board aikati asayartem taa ajemtsütsüsa kumogo.

Cricket Australia-i parnok indang staff timbaka nem taa magütsü lir, kasa mapang England aser Wales Cricket Board-i parnok indang staff tem nem taa ajemer agütsütsü asoshi sangdongogo.

Tanga tongtibang saisapongtem talisa, football asaya nung English Premier League aser Spain nung La Liga asayartem taa ajemer agiba osang angazükogo.

Ajisüaka, Arun Dhumal, shiba taoba kum president Sourav Ganguly aser secretary Jay Shah na den külemi BCCI nung dena liasü, pai ashiba agi, asayartem atema taa majemtsütsü imlar.

"Koda masü mepaidoktetba timtem tulu ka majurura onoki asayartem taa ajemtsütsü asoshi meinyaksü," ta Arun-i ashi.

"Ibayongji, akoksaba tem asadanga, agütsütsü alibatem metetsü asoshi onoki inyakdar. Item takoksa asadangtetterba sülen onoki asayartem atema taa ajemtsütsüsa inyaksüsa akok, saka iba maparen jibo onok mapatong nung tatembangbuba teinyaksü asütsü," ta Arun-i metetdaksü.

Dhumal-i ashiba agi, India indang Sri Lanka tour cricket asayamung ya June ita nungi tenzüktsü tebilemba lir, saka wara ya süshia aonungang asayamung ya asayatetsü.

"Iba wara nungi cricket asayartem kumzuka yutsütsüji teinyaksü tongtibangtiba aser tensa mejungi ao, mesüra wara süshia mao nungbo, onoki iba India tour asayamung-a thitsütsü," ta Arun-i metetdaksü.

Arun-i ashiba agi, cricket asayamung tem tenzükshitsü asoshi International Cricket Council den BCCI tekolakpurtemi mapang shia sensaksemdar.

October ita Australia nung Twenty20 World Cup asayamung aser iba sülen India indang Test asaya pezü den ODI asaya asem tashi asayatsü asoshi osang tejangja ka magütsüti lir.

Dhumal-i ashiba agi, iba tour metenzükdang, India nunger cricket asayartem hopta ana quarantine nung ayutsü asoshi mulunga lir.

Ajisüaka, World Cup asayamung thitsü nungang iba tour atema item maparen inyaktettsü, ta AFP dang Arun-i ashi.

"Tatishitsü agi, T20 World Cup asayatsü atema India cricket team Australia-i otetera, asayartem quarantine nung ayutsü asoshi kecha nungdak madoker, kechiyong onoki iba tesem nung ita ka jungnüa mesüra iba dak tema asayamung nung shilem agiadoker alitsü," ta Arun-i ashi.

"Cricket Australia-i T20 World Cup asayamung dak sendakba nung osang tejangja ka agütsütsü asoshi tang parnok iba jenjang nung mali. Sorkar tetuyuba aser senzüsembongtsü asoshi tenokdangba dak-a tuluka keta lir. Ajiasünung, Cricket Australia telemtetba asoshi atatsüba dang," ta pai ashi.

AIFF-i Arjuna Award atema Jhingan & Bala na tenüng agütsü

Monupii/May 12, 2020 (Agencies): All India Football Federation-i, Arjuna Award atema national team central defender Sandesh Jhingan aser tetsür team striker N Bala Devi na tenüng agütsüogo.

Takum saisapong tetushi atem tenüng benoktsü asoshi Sports Ministry-i tetuyuba agütsüba dak ajemdaker AIFF-i tena tenüng agütsüogo, koba parnok asoshi asayar shimtsü atema tasak masü asü.

"Sandesh aser Bala Devin nati kanga junga asayaa aruba apir onoki Arjuna Award atema tena tenüng agütsüogo," ta general secretary Kushal Das-i PTI dang ashi.

Paisa, kum tem tsüngda tenati kanga junga asayaa aruba dak ajemdaker iba tetushi narokum atema tena tenüng agütsüogo, ta ashi.

Arishi kum 26 tain Jhingan shiba, asaya tenzükba mapang Sikkim United nung Bhaichung Bhutia aser set-piece specialist Kennedy Singh den asayaa liasü, pa kum tem tsüngda India team nung kanga tongtibang asayar ka kumogo.

2015 kum FIFA World Cup qualifier ka nung India team nungi mezüng asayaba sülen,

Tetsür ODI asertebur U19 World Cup qualifiers thitsüogo

Dubai, Monupii/May 12 (Agencies): COVID-19 wara süshia maoba ajanga, July ita 2021 Tetsür World Cup asayamung aser 2022 kum tebur Under-19 atema qualifying asayamung anaprongla Mongolbarnü International Cricket Council (ICC)-i thitsüogo.

Sri Lanka nung July 3 nungi 19, 2020 tashi asayatsü aliba tetsür World Cup asayamung nung team 10 - asayamung ayonger Sri Lanka team den Bangladesh, Ireland, Netherlands, Pakistan, Papua New Guinea, Thailand, United States, West Indies aser Zimbabwe team tem asayatsü renemer liasü. Item team nungi team asembo taruba kum New Zealand nung asayatsü aliba World Cup asayamung atema qualify sür alitsüba asü.

"ICC züngsemtem aser sorkar den public health tekolakpurtem den jembishinüba sülen, ICC Women's Cricket World Cup 2021 aser ICC U19 Cricket World Cup 2022 atema qualifying asayamung thitsütsü asoshi onoki telemtetba agi," ta sangdong ka ajanga ICC-i metetdaksü.

ICC U19 Cricket World Cup 2022 atema qualifying asayamung ya July 24 aser 30, 2020 tsüngda Denmark nung European Regional Qualifier

ISL club Kerala Blasters' nungi asayar ya India team nung pa jenjang khen danga maitsüi asayaa arudar.

Pa asayaba yimya agi taoba national team coach Stephen Constantine kanga pua aser pai Chhetri yirur masayatetba mapang pa nem captain mapa belenoktsü. Pai captain ama asaya aika nung team anir asayago.

Maneni India nung football asaya nung Bala Devi ya kanga nungtugu lir.

Takum kum tetenzüklen arishi kum 30 tain Manipur tsür la yagi otsü tasen ka yanglua ita 18 atema Scottish Women's Premier League club Rangers FC nungi asayatsü asoshi tenangzüktepbka ka yanglu aser India tsürtem rongnung linük adena orr asayar mezüngbuba akum.

COVID-19 tashidak prokshia aoba ajanga asayamung mathi tsüngda la Scottish Women's Premier League nung asaya ishika nungbo shilem agiogo.

Novel coronavirus prokshia aoba dak sendakba nung osang agütsütsü asoshi Asia nungi asayar tongtibangtem indang Asian Football Confederation's #BreakTheChain video campaign nung Bala Devi-a densema liasü.

asayamung tenzükba mapang ka nung külemi tenzüktsü asoshi renemer liasü.

Tang thitsüba asayamung ya asayatetsü asoshi ICC-i asayamung nung shilem agitsüpur züngsemtem den sensaksemtsü.

ICC Head of Events, Chris Tetley-i ashiba agi, "Senzüsembongtsü asoshi maneni nokdangba, nüburttem iba wara nungi kumzuka alitsü asoshi sorkar aser public health tekolakpurtem ajanga agütsüba tetuyuba dak sendakba nung anidaka taruba qualifying asayamung anaprongla ya thitsütsü asoshi onoki telemtetba agiogo."

"Women's Cricket World Cup Qualifier aser Europe qualifier nungi shir U-19 Cricket World Cup 2022 qualifier asayamung ajunga iba wara süshia maoba ajanga masayatetsüsa kumogo. Iba dak alia, asayartem iba wara nungi kumzuka yutsütsüji teinyaksü tongtibangtiba lir," ta Tetley-i ashi.

Africa asayamung ya Tanzania nung August 7 aser 14, 2020 tsüngda; aser Asia asayamung ya Thailand nung December 1 aser 9, 2020 tsüngda asayatsü renemer liasü. Iba den külemi, tesem pungoprongla nung Division 1 asayamung ajunga ya 2021 kum asayatsü anogo latetta lir.

BILEMDANGANG

"Tashi mangartem ya alima MESEN lir."